

四庫全書

史部

欽定四庫全書

史部

欽定盛京通志卷二至四

少詹事_臣曹城履勘

總校官編修_臣朱鈴

欽定四庫全書

欽定盛京通志卷二

聖製

太宗文皇帝聖訓

欽定四庫全書

卷二

欽定四庫全書

欽定盛京通志卷二

聖製二

太宗文皇帝聖訓

天聰元年丁卯五月癸未

上命繫書於矢射入錦州城中

諭曰爾城內一應官吏軍民等與其饑困而死不如縋而出降必縱爾歸令與父母妻子相見昨我軍到時臺堡

降衆二千餘人悉令縱還想爾等亦聞之矣今我豈肯
舍此垂陷之城而去俟我攻城軍士雲梯挨牌綿甲一
到即行攻取玉石俱焚噬臍何及曷若於未攻城之先
縋城出降我必使爾室家完聚有官職者自當優叙恩
養

天聰三年己巳八月乙亥

上諭曰自古國家文武並用以武功勘禍亂以文教佐太
平朕今欲振興文治於生員中考取其文藝明通者優

獎之以昭作人之典諸貝勒府以下及滿漢蒙古家所有生員俱令考試各家主母得阻撓有考中者仍以別丁償之

天聰五年辛未七月庚子

上召集諸將

諭曰瀋陽遼東之地原非我有乃

天所賜也今不事征討坐視漢人開拓疆土修建城郭繕治甲兵使得完備我等豈能安處邪朕是以不惜財帛

及與朝鮮通市所得貨物盡與蒙古易其馬匹興師致討此行儻荷

天佑克奏厥功凡俘獲之人勿離散其父子夫婦勿掠取其衣服當加意拊循以副朕戡亂寧人之意爾諸臣於各軍士宜諄切曉諭若止於傳諭時唯唯聽命退而遂忘自不免生事橫行致干罪戾矣朕今不自暇逸躬率大軍前往或彼被困而來降或

天垂佑而致勝則飲至休兵三軍解甲定有其時自征明

額駙固三泰朕非以其臨陣怯懦不能稱職革都統任也當進攻昌黎時本旗一卒被傷至死以繩繫其足曳之而歸夫戰則用之而死不加恤誰復效死直前邪必也死則恤之傷則臨視調治之乃可為主帥爾都統等果能體恤士卒則人皆效死願授命於主將之前矣我軍總計雖衆若都統副都統叅領佐領各就所屬而戒諭之不難遍及要在申明法令愛惜士卒則人人競奮建立功名豈不美乎

天聰六年壬申三月戊戌

上諭巴克什達海曰國書十二頭字向無圈點上下字雷同無別幼學習之過書中尋常語言視其文義易於通曉若至人名地名必致錯誤爾可酌加圈點以分析之則音義明曉於字學更有裨益矣

天聰六年壬申八月癸酉六部衙門工竣

上親往視還宮時召六部啟心郎諸臣

諭之曰朕以爾等為啟心郎爾等當顧名思義克盡厥職

如各部諸貝勒凡有過失爾等見之即明言以啟迪其
心俾知改悔若一時面從及事已往而退有後言斯最
下之人所為也汝等先自治其身身正而後可以言諫
上如不治其身不勤部事則自反尚多抱愧何以取重
於人雖懇切言之上必不聽人亦不信也

天聰七年癸酉正月庚子

上諭各佐領曰田疇廬舍民生攸賴勸農講武國之大經
爾等宜各往該管屯地詳加體察不可以部務推諉若

有三佐領同居一堡者著於各田地附近之處大築牆垣散建房屋以居之遷移之時宜聽其便至於樹藝之法窪地當種梁稗高田隨地所宜種之地瘠須加培壅耕牛須善飼養爾等俱一一嚴飭如貧民無牛者付有力之家代種一切徭役宜派有力者勿得累及貧民如此方稱佐領之職若以貧民為可虐濫行役使惟爾等子弟狗庇免其差徭則設爾佐領何益耶至所居有卑濕者宜令遷移若憚於遷移以致傷稼害畜俱爾等

佐領是問方今疆土日闢凡田地有不堪種者儘可更換許訴部臣換給如給地之時爾佐領自占近便沃壤將遠瘠之地分給貧人許貧人陳訴再爾等於該管之地各宜督率所屬長幼於春夏秋三時勤于習射朕不時遣部臣往察如有不能射者必治佐領之罪此係我國制勝之技何可不努力學習耶

天聰七年癸酉九月辛丑

上御殿召証明山海關貝勒大臣等責之曰爾等此行用

兵甚不合法既捷之後何不深入內地收取糧餉休息
士馬乃遽速還耶貝勒雖欲還軍揚古利爾係舊臣何
不諫止爾若能諫貝勒誰不聽從想爾為築室未成乘
此未寒急圖竣工故遽來耳即來時爾諸貝勒若令率
領精兵殿後截殺明之追兵必獲大勝何至相率俱來
止留圖魯什勞薩等峭兵殿後彼時敵兵數千追至雖
以寡敗衆實皆

上天眷佑及我兵精銳故也萬一有失不知爾貝勒等尚

能來見朕否圖爾格納穆泰蘇納等係有罪之人雖經革職仍用為各部承政凡遇攻城不令爾等前往今乘此凱旋之際正宜率兵殿後戮力建功以圖自效乃亦隨衆前行倘他日大軍出征攻城野戰之時衆皆奮勇齊進誰肯居爾等後者爾等將何時自奮乎

皇考太祖時教堪特翁格伊喇喀努賽四臣皆能率先力戰並未嘗歿於臨陣夫人生能有百歲乎天數既盡不免於亡巴克什武納格所在建功今又殿後首先殺敗

敵兵人臣為國義當如此爾諸大臣不能啟迪貝勒之心竭力為國止圖安享富貴遂巡畏縮不知爾等可能長保富貴耶

天聰七年癸酉十月己巳

上諭文館儒臣曰昔

皇考太祖欲剏造滿書巴克什額爾德尼辭以不能

太祖曰汝何謂不能但以蒙古字合我國之語音聯綴成句何為不可吾意已定汝毋辭額爾德尼乃一代傑出

之人今也則亡彼所造之書義或有在其後巴克什庫爾禪所增朕恐終有未合爾記載諸臣將所載之書宜詳加訂正若有舛謬之處即酌改之朕嗣大位凡

皇考太祖行政用兵之道若不一一備載垂之史冊則後世子孫無由而知豈朕所以盡孝乎

天聰八年甲戌四月辛酉

上諭曰朕聞國家承天創業各有制度不相沿襲未有棄其國語反習他國之語者事不忘初是以能垂之久遠

永世勿替也蒙古諸貝子自棄蒙古之語名號俱學喇嘛卒致國運衰微今我國官名俱因漢文從其舊號夫知其善而不知從與知其非而不能省俱未為得也朕續承基業豈可改我國之制而聽從他國嗣後我國官名及城邑名俱當易以滿語毋得仍襲漢語舊名俱照我國新定者稱之若不遵新定之名仍稱漢字舊名者是不奉國法恣行悖亂者也察出決不輕恕

天聰八年甲戌十二月壬辰

上命管步軍副都統巴奇蘭叅領薩穆什喀率領官兵往

征黑龍江地方

諭曰爾等此行道路遙遠務奮力直前慎毋憚勞而稍怠也俘獲之人須用善言撫慰飲食甘苦一體共之則人無疑畏歸附必衆且此地人民語音與我國同携之而來皆可以為我用攻畧時宜語之曰爾之先世本皆我一國之人載籍甚明爾等向未之知是以甘于自外我皇上久欲遣人詳為開示特時有未暇爾今日之來蓋

為爾等計也如此諭之彼有不翻然來歸者乎爾等其勉體朕意大丈夫凡受委任當圖報稱語云少壯不努力老大徒傷悲誠哉是言若此時不力圖建樹異日雖悔何益耶

天聰九年乙亥二月午午

上諭曰邇者察哈爾國新附各官頻加恩宴其燕京及大凌河歸順各官久未宴勞雖得新附之員其舊歸我國者詎可頻忘耶

諭畢遂設宴召燕京及大凌河歸順各官自守備都司以上皆集內庭宴之時預宴各官有形容憔悴者上見之曰或者貝勒等不加恩養以致如此雖得新附之人何乃轉忘先歸之人我國家蒙

天眷佑所得大小官員人等朕皆一體加恩未嘗分別新舊嗣後一體恩養不可使先歸者反致失所遂遣人徧諭諸貝勒

天聰九年乙亥三月戊辰

上集諸臣於朝

諭之曰朕昨出見民間耕種愆期蓋因佐領有事城工欲
先時告竣故額外派夫致誤耕作築城固為正務然田
地荒蕪民食何賴嗣後有濫役民夫致妨農務者該管
佐領等俱治罪

天聰十年丙子三月庚申內院諸臣擬新築開原
城門名曰揚威昭德永安興化定遠進呈

御覽

上曰此等矜誇侈大之字素與朕意不合興之揚之定之
悉在於

天非人力所能強得也凡事莫貴於務實今當以字義切
當者書之遂更其名曰鞏固門靖遠門鎮西門

崇德元年丙子四月乙酉

上建國大清改元崇德諸貝勒大臣朝賀時朝鮮使臣羅
德憲李廓不拜

上曰朝鮮使臣羅德憲李廓無禮處難以枚舉是皆朝鮮

國王有意構怨欲朕先起釁端戮其使臣然後加朕以背棄盟誓之名故令其如此耳不知朕之素行從不逞一時之小忿如此瑣屑也即兩國已成讐敵兵刃相加爭戰之際以事遣人亦無即戮其來使之理況朝會乎其勿問

崇德元年丙子四月丁亥

上受尊號禮成諸貝勒大臣上表慶賀

上諭曰朕以涼德祇承丕緒加受尊號懼無以慰衆望爾

等勸進再三屢辭弗獲今敬告

天

地允受尊號爾諸貝勒大臣當同心輔政恪共厥職以匡
朕之不逮正己率屬各殫忠誠立綱陳紀毋圖小利儻
能建立功名朕當隆以爵賞尤須撫衆恤民君臣一德
庶幾上合

天心下遂民志如此則明良喜起政治咸熙萬民樂利
天益佑助之矣

崇德元年丙子九月辛未

上遣都察院承政阿什達爾罕大學士范文程剛林等

諭凱旋多羅武英郡王阿濟格等曰朕聞我軍後隊方至
舊遼陽河渡口爾等已抵家二日矣爾等當速往迎之
朕畀爾以心膂重任者為愛養此兵民耳朕一人之心
思能徧及乎君享康寧臣居尊顯俱兵民是賴即爾等
功名亦藉士卒之力乃不思效力死戰之士而先自還
家漠不相顧於心奚忍耶忘死戰之士卒令長途勞苦

此後士卒誰肯為用命邪衆大臣奏曰

皇上明訓臣等願親自往迎

上曰都統以上免其親往副都統以下可選能辦事者往迎之

崇德元年丙子十月丁丑

上召羣臣集篤恭殿傳

諭曰國家崇尚節儉毋事華靡凡鞍轡等物不許以金為飾雖富家不少藏金止許造盤盂匕箸蓋此等之類或

至匱乏尚可毀為他用若以之塗飾則零星耗折豈能復取而用之今後著永行禁止至於陣獲緞帛用之亦當節儉勿以獲取之易奢費無度而忘其紡績之勞也

崇德元年丙子十一月癸丑

上御翔鳳樓集諸親王郡王貝勒及內院大臣等讀金世宗本紀

上諭諸臣曰爾等審聽之世宗者蒙古漢人諸國聲名顯著之賢君也故當時後世咸稱為小堯舜朕披覽此書

悉其梗槩殊覺心往神馳耳目倍加明快不勝歎賞朕
思金太祖太宗法度詳明可垂久遠至熙宗合喇及完
顏亮之世盡廢之耽於酒色盤樂無度效漢人之陋習
世宗即位奮圖法祖勤求治理惟恐子孫仍效漢俗預
為禁約屢以無忘祖宗為訓衣服語言悉遵舊制時時
練習騎射以備武功雖垂訓如此後世之君漸至懈廢
忘其騎射至於哀宗社稷傾危國遂滅亡乃知凡為君
者耽於酒色未有不亡者也先時儒臣巴克什達海庫

爾禪屢勸朕改滿洲衣冠效漢人服飾節度朕不從輒
以為朕不納諫朕試設為比喻如我等於此聚集寬衣
大袖左佩矢右挾弓忽遇碩翁科羅巴圖魯勞薩挺身
突入我等能禦之手若廢騎射寬衣大袖待他人割肉
而後食與尚左手之人何以異耶朕發此言實為子孫
萬世之計也在朕身豈有變更之理恐日後子孫忘舊
制廢騎射以效漢俗故常切此慮耳我國士卒初有幾
何因嫻於騎射所以野戰則克攻城則取天下人稱我

兵曰立則不動搖進則不回顧威名震懾莫與爭鋒爾等其謹識朕言

崇德二年丁丑四月丁酉

上御翔鳳樓

諭諸王貝勒等曰昔金熙宗及金主亮廢其祖宗時衣冠儀度循漢人之俗遂服漢人衣冠盡忘本國言語迨至世宗始服舊制衣冠凡言語及騎射之事時諭子孫勤加學習如元王馬大郭遇漢人訟事則以漢語訊之有

女直人訟事則以女直語訊之世宗聞之以其未忘女
直之言甚為嘉許此本國衣冠言語不可輕變也我國
家以騎射為業今若不時親弓矢惟耽晏樂則田獵行
陣之時必致疎曠武備何由而得習乎蓋射獵者演武
之法服制者立國之經朕欲爾等時時不忘騎射勤練
士卒凡出師田獵許服便服其餘俱令遵照國初之制仍
服朝衣且諄諄訓諭者非為目前起見也及朕之身豈有
習於漢俗之理正欲爾等識之於心轉相告誡使後世子

孫遵守無變棄

祖宗之制耳

宗德三年戊寅八月癸丑

上命和碩睿親王多爾袞為奉命大將軍以多羅貝勒豪格多羅饒餘貝勒阿巴泰副之統左翼軍多羅貝勒岳託為揚武大將軍以多羅安平貝勒杜度副之統右翼軍兩路征明召集出征諸王貝勒大臣宣示軍律

諭曰征伐非朕所樂為也朕常欲和而明不從是以興師耳有不抗拒我兵者若擅行誅戮則殺人者與主兵者均難辭咎甚非朕撫安黎庶之意也又

諭各官曰丙子歲多羅武英郡王領兵征明克昌平州爾等以貪掠獲罪者甚多朕豈願爾等犯法樂于加罪懲前此妄行貪暴之人正欲警之於後使不為亂且朕見爾等有罪甚為惻然朕非誇詡以古人自擬嘗閱古史云夏禹道遇罪人而泣侍臣曰此犯法有罪之人王何

為而泣禹曰堯舜時政教德澤宣布於民故人無犯法
令我之泣非為囚也我之政教德澤不如堯舜致有罪
人故泣耳朕見爾等有罪亦甚為惻然也爾等亦互相
勉勵恪遵軍令以行毋或怠玩從事今蒙古漢人朝鮮
諸國俱已歸附軍營壯盛爾等勿徒自恃強勇以威懾
人各宜申明紀律無或厭倦蓋爾等乃衆所觀瞻也若
乃自處以禮濟之以和則歸附各國必以為我國強而
有德勇而有禮益加悅服矣凡為主帥之人於臨陣之

際使徒計一己之功而不念兵之死傷軍之敗歟及國之聲名有損非主將也興師致討當思於國有益於己無愆凡軍中議事遇有意見悖謬者即宜在彼勸諭毋得緘默不言而徒於還時托辭自解亦有在彼故出微辭而辯時則云我曾如是勸諭者皆不足據必在彼明言於衆不從始可於還時辯理也

崇德三年戊寅九月癸亥

上命奉命大將軍和碩睿親王多爾袞等率左翼軍征明

敕曰古帝王興師克敵撫定疆宇必選擇於衆拔一良將
特授兵權則軍有所統而大事始定今因明國不肯講
和樂於干戈故命爾和碩睿親王多爾袞充奉命大將
軍授以敕印率左軍西伐爾其同貝勒與滿洲蒙古及
漢軍各都統僉慮協謀擇其善而從勿以受命重而邀
功勿以將士勇而輕敵凡駐營壘嚴設偵探小心提防
勿得少怠務須信賞必罰激勵將士破彼邊關直入其
境多謀定策密察敵人之機聲東擊西默運乘便之智

出其不意攻其無備至於待將士勿護所愛勿蔽所憎
有衝鋒破敵奮勇先登者必破格優賞仍錄其功以奏
叅遊以下有敗陣及違軍律者先斬後奏尚其欽哉勿
違朕命

崇德六年辛巳四月甲寅

上召內院諸臣進清寧宮命讀元史至世祖遣丞相巴延
率師征宋時值炎天恐行軍不利敕俟入秋再舉
巴延奏云宋之據江海如窮獸之負隅今已困彼

旋復縱之則逸而逝矣遂南征滅宋統有天下

上遣大學士范文程剛林等至篤恭殿傳

諭有罪王貝勒貝子公大臣等曰元世祖恐炎熱敕巴延
侯入秋伐宋巴延執諭必舉遂興師滅之今汝等不圍
通錦州屯兵遠處任意畋獵急圖歸家視彼為何如也
朕非窮究爾等但以巴延勤國之心令爾等知之耳

巴延

原作伯顏

今譯改

崇德七年壬午五月癸酉

上御崇政殿命擒獲明總督洪承疇總兵祖大壽副將祖澤遠等朝見洪承疇叩首請罪

上諭曰彼時與我軍交戰各為其主朕豈介意朕所以宥爾者以擊敗十三萬兵與得松錦諸城皆天也天道好生善養人者斯合天道朕欲推恩活爾爾但念朕撫育之恩盡心圖報從前情罪悉予寬釋昔陣前所獲張春亦曾養之彼不能為明死節又不能效力事朕一無所成而死爾慎勿如彼之所為也祖大壽叩首請罪

上諭曰爾之背我一則為爾主一則為爾妻子宗族耳然得汝而不加誅之意朕懷之久矣朕常語內院諸臣曰祖大壽必不能死後來被困仍當俯首來降朕則始終待以不死也往事已不可追此後當竭盡爾力以事朕則善矣祖澤遠叩首請罪

上諭曰爾乃志量褊淺之人所以不復來歸者亦視主將祖大壽耳昔朕往視杏山爾不但不肯開門來降乃明知是朕而特發火礮豈非背恩之大者乎爾舉礮能傷

幾人耶無論爾小城士卒無多即洪承疇以一十三萬兵屢舉火礮所傷亦復有幾朕因爾背恩太甚故言及此朕見人之過即明言曉諭斷不念其舊惡事後復加推求豈但待爾如此即尊於爾之祖大壽尚且留養況爾小人何足加誅爾年方少壯自後凡遇戰陣奮發效力可也

崇德八年癸未六月己卯

上諭諸王貝勒貝子公等曰前諭王貝勒貝子公等將各

所屬新舊人等加意恩養乃聞王貝勒等於近侍官員
頻頻賜之以食至旗下官員守門護軍及新附之人竟
不得沾恩養如此甚為失宜試思獨養官而不養民養
賢而不養不肖官雖賢亦豈能獨立乎以上下相維之
理言之必為在下之人所托命而後可為在上之人如
無在下之人則統轄者誰役使者誰也朕幸承

天眷以我兵之半往征明國遂能破其關隘克其城池皆
因撫綏各國俾傾心歸順勢大力強之所致若止恃舊

日之兵豈能致此乎朕素於諸王貝勒貝子公等一切家事俱不預聞嗣後於新舊人等孰愛養有方孰漫不撫恤必加詳察爾諸王貝勒貝子公等共宜加意愛養其都統護軍統領及近侍護衛等各宜啟迪其主凡見新舊窮苦之民即告知本主給之衣食俾皆得所如此方可謂賢不然止圖一己之豐厚不以衆人為念衆人豈復有繫戀爾等之心耶此後凡新舊人有因不沾恩養自行陳訴者所告果實該王貝勒皆坐罪若原告係

騎兵將該管都統一例治罪若係護軍將統領一例治罪蓋善養人者國之要務不可忽也又有効力行間勤勞素著而不免窮困者亦有秉質推魯拙於經營而甘處貧乏者此等之人該管佐領察報都統轉啟各王貝勒酌給僕役牛馬以贍養之如王貝勒貝子公等不能贍養即以不能贍養具疏奏聞俟朕贍養之其有不思隨征不畜馬匹止圖自養身家藉口貧乏者不許濫及察報之時各佐領毋得徇庇親屬此番出征所獲牲畜

財物必須撙節儉用豈可恃俘獲以為生計耶夫出師征伐以有土有人為立國之本非徒為財利也至于厚生之道全在勤治農桑耳

崇德八年癸未九月乙酉

上幸御馬殿見部臣役遣民夫修治道路不分高下皆增土培高

諭諸臣曰國有差徭民力疲敝皆由工部所致如修治道途不過損高就下取其平坦而已乃不論高下概令

培築重困民力甚為擾累至於民房稠密之處不即量
行拆毀布置均勻乃止揭取數椽而置之小民何以安
居爾等其詳加查究

欽定盛京通志卷二

欽定四庫全書

欽定盛京通志卷三

聖製三

世祖章皇帝御製文

詔

碑文

祭文

欽定四庫全書

欽定盛京通志卷三

聖製

三

世祖章皇帝御製文

詔

入關定鼎

登極恩詔

順治元年

皇帝詔曰我國受

天眷佑肇造東土

烈祖邁圖鴻緒

皇考彌廓

前猷遂舉舊邦誕膺

新命迨朕嗣服雖在冲齡締念紹庭永綏厥位頃緣賊氛
游熾極徂明朝是用託重親賢救民塗炭乃方馳金鼓
旋奏澄清既解倒懸非富天下而王公列辟文武羣臣
暨軍民耆老合詞勸進懇切再三乃於今年十月初一

日祇告

天

地

宗廟

社稷即皇帝位仍建有天下之號曰大清定鼎燕京紀元
順治緬維峻命不易勗業尤艱況當改革之初更屬變
通之會爰乃酌今準古揆天時人事之宜庶幾吏習民
安彰

一
卷三
祖功

宗德之大所有合行條例臚列如左

郊

天配

祖詔

順治五年

皇帝詔曰大一統之業禮莫重於配

天通孝思之誠情莫切於尊

祖謹於順治五年十一月朔八日冬至恭祀

天於南郊奉

太祖承天廣運聖德神功肇紀立極仁孝武皇帝配饗即

於是日推本

孝思追尊

太祖以上四世

高祖澤王為

肇祖原皇帝

高祖妣為原皇后

曾祖慶王為

興祖直皇帝

曾祖妣為直皇后

祖昌王為

景祖翼皇帝

祖妣為翼皇后

考福王為

顯祖宣皇帝

妣為宣皇后典禮綦隆覃恩宜廣特大赦天下以慰官民
應行事宜條列於後

奉

太祖

太宗配饗詔

順治十四年

皇帝詔曰自古帝王禋祀天地必崇奉祖宗侑饗所以昭
功德申孝敬甚鉅典也恭惟

太祖武皇帝智勇懋昭肇開駿業

太宗文皇帝寬仁覃播繼廓鴻圖厚德豐功俱垂萬世並
宜配饗以盡尊崇朕仰承

天眷纘嗣

先猷南郊祈穀奉

太祖武皇帝配祀典禮已先舉行茲復昭告

天

地

宗廟

社稷率諸王貝勒羣臣於順治十四年三月初六日如冬至祈穀儀恭祀

上帝奉

太宗文皇帝同配於初九日如夏至儀恭祀

皇地祇奉

太祖武皇帝

太宗文皇帝並配式舉宏章宜頒湛惠

碑文

肇祖原皇帝碑文

粵稽書稱觀德詩詠發祥莫不由本支而溯厥初生祇
享假以垂夫來葉既隆報本之典亦昭受命之符洪惟
我

肇祖原皇帝暨

原皇后德合天地功配陰陽似后稷聿始周模同帝嚳肇
開唐業啟迪

列祖雄圖衍百禩家傳默祐冲人大統懋九圖帝業顧瞻
陵廟彌嚴祇敬之心鐫勒碑銘益篤靈承之慶卜年卜世
光華宣著千秋以祀以禋繼述遐昌奕代昭垂有永申
錫無疆

興祖直皇帝碑文

稽承家之遐慶溯開國之鴻圖積德累仁發祥有自肇
基垂統錫祉無疆洪惟我

興祖直皇帝暨

恩蓋追盛業以溯開天宜紀鴻勳以昭受命既彰發祥之有自更申錫福之無疆洪惟我

景祖翼皇帝登

翼皇后宏謨大烈厚澤深仁雖未集耆定之勳而不宣有象實始建經綸之業而式廓用光令緒丕昭已見六州歸命皇圖肇造先占率土傾心

原廟重新弓劍衣冠皆起羹牆之慕

山陵永奠子孫臣庶咸蒙佑啟之仁爰勒豐功作本支之

百世載揚休烈錫嘉祉於千秋繼述遐昌昭垂不替

顯祖宣皇帝碑

蓋聞天肇一代之運必著開先啟後之勲聖垂百世之
模必有積德累仁之實丕基方建締造惟勤大業式宏
駿龐宜勒用申報本之典益彰受命之符洪惟我

顯祖宣皇帝暨

宣皇后文謨丕顯武烈載揚星流華渚已秉赤日之祥電
繞辰樞更兆神龍之瑞雖皇猷肇啟大勲未遍於寰區

而

帝緒昭垂

聖德實留於奕禩

橋山載闡百千載無斁明禋

原廟重新億萬年用鑄令烈承庥有永佑祚無疆

興京顯佑宮碑文

自古帝王統御天下必以仁義為本尤懋恭肅而崇祀
明神蓋期國祚熙昌俾兆民無不康寧之故欽惟神莫

大於

昊天而事莫隆於開創虔恪之志益當加倍尋常惟茲興
京所建顯佑宮始於締造之初昭事

上帝之所其闕甚重運祚靈長神實啟之臣民瞻仰神實
迪之是以國家膺圖御錄固我

太祖高皇帝

太宗文皇帝開駿業而肇鴻基本仁義而施政教所致然
荷茲

天眷者豈非誠敬萬靈懷柔河嶽之故歟是以

天無所不在事

天之心即無時不謹稽王業所自始地擅神臯邇

祖德所潛通歆居

上帝朕夙夜寅恭冀登上理睠念受命發祥之地益深欽
天率

祖之思已命所司繕整維新春秋禋祀載表功德樹豐碑
以傳不朽於戲艱難不昧常懷對越之誠丹牘丕章永

保岡陵之固後之子孫臣庶其無忘朕敬事之意焉

盛京景祐宮碑文

自古帝王之興莫不首隆祀典凡有功德於民者皆為建壇宇而通牂蠻蓋神既佑民以福國則國必崇祀以報神此廟貌之所由隆也我

太祖

太宗手定大業拯斯民於塗炭膺景祚之綿長雖積功累仁所致而百神之靈實式憑之大清門東三官殿尤神靈

顯赫而及民功德為最著者考之道書三官廟之神有
天地水府之別國家當干戈擾攘之際急圖康阜使時
和年豐室廬相慶則天官賜福主之其或貫索未空金
氣猶沴使斯民秉德格非遠刑罰而登仁壽則地官赦
罪主之又或大軍之致凶年大荒之致奇疫滌其青災
而消其害氣則水官解厄主之然則使民康寧而因以
默佑我邦家孰非神之賜也歟嗚呼發祥重地永藉呵
護之靈凡我生民咸蒙又安之福爰命勒石用表神功

以垂不朽云

莊親王舒爾哈齊碑

順治十一年

惟國家褒顯宗英推崇皇族生頌榮秩歿予追封所以
篤本支昭親愛也爾達爾漢巴圖魯舒爾哈齊乃

太祖高皇帝胞弟朕之叔祖系序既尊天潢孔切更生賢
胄克奏膚功宜用追崇以彰祖德茲特加封爾為莊親
王列在藩屏聿展貽孫之義光施泉壤允敷敦睦之仁
勒諸貞珉永垂不朽

弘毅公額亦都碑

順治十一年

帝王得人共圖大業治定之日必昭其功於天下後世
以志不忘洪惟我

祖宗創業艱難一時鷹揚之佐邁會風雲號稱濟濟成蹟
具在藏於冊府額亦都者奮跡戎行戰功久著從征哈
達烏拉葉赫暨攻圖倫襲塞克濟率衆先登敵無堅壁
至取巴勒達城奮軀登堞矢貫其身連於堞上以刀斷
之猶能入城其驚猛有過人者少年歸命身經百戰屢

被重創遍體瘡痍如收赫錫赫瑚爾哈雅蘭諸部又能
以少擊衆俘獲甚多開拓疆土厥績懋焉

太祖嘉與勲庸賜以婚媾及其歿也

先皇復加追序高爵崇祀軫恤甚備國有若臣可謂忠勇
忘身有始有卒者矣用勒貞石以示表章歲月逾遠嘉
績彌彰於以褒勸有功庶幾宣力國家者聞之而有感
焉

忠義公圖爾格碑 順治十一年

國家肇造鴻業櫛風沐雨宣力効忠繫虎臣是賴故生
膺寵錫歿與表揚公侯干城渥以典禮所以傳其豐功
偉績至今而不衰也故忠義公圖爾格義勇無敵忠蓋
不渝曩從

太祖屢著戰功翼佐

太宗戰山左扼關門逐錦杏身被重創洒血疾趨惟爾庸
特下青齊克名城殲渠魁先後登殿力保

御幄惟爾庸方期爾共享太平股肱是寄而爾早侍

皇考於九天矣朕惟追憶前勞悼念無已雖恩卹屢加朕心猶歉特允禮臣請勒石銘勲昭垂百世於戲忠貞世篤賞延於後其所謂文武為憲者耶爾英爽昭著服茲寵休垂示後人庶識朕報功之典永永罔替云

果壯公超哈爾碑

順治十四年

朕惟國家開創大業必有英賢佐命建立鴻勲生固顯秩崇階振威德於天下歿亦榮名美謚傳盛烈於後昆此錄故舊之深情勸忠臣之巨典也緬惟我

太祖

太宗時舊臣推誠宣力矢志服勤貞心亮節屹然不磨
朕豈能已於追念也哉爾超哈爾原係護軍統領任禮
兵二部侍郎以辦事有能授騎都尉後往董家口送諭
帖遇敵哨兵殺之二次征明都城時擊敗敵哨生擒蒙
古二人都城北遇敵兵及盧溝橋步兵領護軍肅擊敗
之初次過明都城往征山東時過馮太監兵率本叅領
兵擊敗之指揮攻克任邱縣遇趙北口守河橋步兵領

本旗兵步戰擊敗之又遇郝總鎮兵率本叅領兵步戰
擊敗之出邊之時遇太平寨馬步兵遵指揮擊敗之爾
乃能益勵忠誠封疆攸賴及三次圍錦州時城內兵出
戰在關廟爾遇敵鋒捐軀報國可謂始終盡瘁者矣今
追述往事軫念前勲効力致勇死於原野謚曰果壯以
垂不朽特命勒諸貞珉以光泉壤用昭朕故舊不遺之
至意云爾

端壯公納爾察碑

順治十四年

朕惟國家開創大業必有英賢佐命建立鴻勳生固顯
秩崇階振威德於天下歿亦榮名美謚傳盛烈於後昆
此錄故舊之深恩勸忠臣之巨典也緬惟我

太祖

太宗時舊臣推誠宣力矢志服勤貞心亮節屹然不磨朕
豈能已於追念也哉爾納爾察原係騎都尉因攻伊犁
山城先登取之後征明時進三等輕車都尉爾乃益勵
忠誠封疆攸賴同十六大臣効力行間勤勞茂著後攻

沙嶺城時爾禦敵衝鋒捐軀報國可謂始終盡瘁者矣
今追述往事軫念前勲守禮執義死於原野謚曰端壯
以垂不朽特命勒諸貞珉光及泉壤用昭朕故舊不遺
之至意云爾

僖順公巴拜碑

順治十四年

朕惟國家開創大業必有英賢佐命建立鴻勲生固顯
秩崇階振威德於天下歿亦榮名美謚傳盛烈於後昆
此錄故舊之深恩勸忠臣之巨典緬惟我

太祖

太宗時舊臣推誠宣力矢志服勤貞心亮節屹然不磨朕
豈能已於追念也哉爾巴拜原係蒙古喀爾喀貝子能
識時運倡率部屬首先投順因以郡主下配授三等子
爾能益勵忠誠稱乃厥職今追述往事軫念前徽小心
恭慎和比於理謚曰僖順以垂不朽特命勒諸貞珉光
及泉壤用昭朕故舊不遺之至意云爾

二等子都統佟養性碑

順治十四年

稽古建業驅策羣力不吝爵賞以勸有功昭示於後用
傳不朽所以勵忠蓋甚備也爾終養性原係明撫順城
人能識時運誠心來歸故賜女為額駙授為三等男克
遼東後陞為二等子爾能益勵忠誠稱乃厥職為漢軍
都統率領烏鎗効有勤勞是真始終盡瘁克襄王室者
矣今追述往事軫念前勲勒諸貞珉光及泉壤國典臣
忠庶幾昭垂無斁哉

直義公費英東碑

順治十六年

國家締造鴻圖獎予勞勩厥有常典至隆備也況始事
之臣櫛風沐雨功載盟府者乎爾貴英東忠亦有謀沉
雄善斷當

太祖高皇帝時首先歸命漸陟崇班始力擒兇沁巴顏兩
征佛訥赫地方度取撫順皆能奮勇先進出奇制勝額
齊克貝勒矯制移城爾獨能抗直不迴大義凜凜攻葉
赫志在必克進無返顧卒下其城前後數十載勳勩大
業遐暢天威推陷之勳實多嘉賴雖積勞殞身休烈未

泚

先皇受命之初追念厥功特崇顯爵配享

廟庭而表章尚闕因樹茲貞石昭示將來生建壯猷歿膺
寵錫榮哀有赫式慰永懷庶使宣力國家者聞之有感
云

祭文

祭告長白山文

朕惟國家受命凝庥則山川百神罔不協瑞矧溯興王之迹推翊運之祥尤宜肇舉明禋誕加顯號蓋自天作高山形於歌頌其來舊矣惟

神秀結東陲澤均厚載濬發三江之派廣延千里之區極敷雲洩雨之奇宏濟物利民之用神山異蹟莫有與京仰緬

列聖龍興寶基此地殊珍萃於盛世寶厯奠於萬年爰念
靈符應申昭報朕茲博採彝章折衷禮制特封為長白
山之神載諸祀典

神其益彰英爽丕贊昌期尚歆時享於春秋永奠鴻禧
於

宗社專官告祭惟

神鑒知

欽定盛京通志卷三